



# ATASSUT INATSIARTUNI

---

10. marts 2014

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqqutit imaattut saqqummiuppagut:

**Nunatsinni qatserisartut annaassiniartartullu pillugit Naalakkersuisunut apeqqutit**  
(Inatsisartuni ilaasortat Knud Kristiansen aamma Gerhardt Petersen, ATASSUT)

Nunatsinni innuttaqassutsimut aammalu inoqutigeeqassutsimut sanilliullugu sumiiffinni inoqarfiusuni tamani ikuallattoqarneranik kalerrisaarutit aallartinneqartartut taamaalillutillu qatserisartut annaassiniartartullu avalattarneri taamannarpassuupput, tassa illoqarfinni nunaqarfinnilu. Naalakkersuisunut apeqqutiginiakkatsinnut atatillugu kisitsisinik pissutsit qanoq innerinik ersersitsisinik pissarsiniaraluarpuqut, Nunatsinnili Politiit kisitsisit ataatsimut katersugaatiginngilaat, taamaattorli Nunatsinni Politiit tungaannit naqissuserneqarpoq qatserisartut annaassiniartartut politiillu ikuallattoqarneranut atatillugu avalattariaqartarneri amerlasoorpassuusut.

ATASSUT-mit ilisimaarivarput Nunatsinni qatserisartut annaassiniartartullu ingerlanneqarneri Kommunit, taamaalillutillu Kommunalbestyrelsenit akisussaaffigineqartut. Taamaattorli inuiaqatigiittut ineriartornerput innersuussutigalugu aammalu qatserisartut annaassiniartartullu ineriartornerup ilutigisaanik akisussaaffimmik annertusiartuinnartumik tigummiarnerat innersuussutigalugu, isumaqarpugut piffissanngortoq naalakkersuinikkut Kommunit peqatigalugit qatserisartut annaassiniartartullu aaqqissugaanerat qanoq ineriartortinneqassanersoq oqaloqatigiissutigineqassasoq.

ATASSUT-mit ilisimavarput ukiuni kingullerni, immaqaluunniimmi oqaannaraanni ukiorpassuannngortuni qatserisartut annaassiniartartullu atugaat malunnaatilimmik pitsanngoriartinneqarnikuunngitsut, aarleqqutigarpullu pissutsit taamaaginnassappata nunatsinni qatserisartoorususeq aammalu annaassiniartartoorususeq annikilluartussasut, tassa taakkununnga



## ATASSUT INATSISARTUNI

---

sulinermi atugassarititaasut pitsanngoriartinneqanngippata. Taamaammat ilanngullugu kissaatiginartipparput Namminersorlutik Oqartussat Nunatsinni Kommunit peqatigalugit Nunatsinni qatserisartut annaassiniartartullu peqatigiiffiat “Kalaallit Nunaanni Qatserisartut Peqatigiiffiat” oqaloqatigalugu aallartissagaat taakkulu kissaataat tusaaniarneqassasut.

Taamatut tunngavilersuuteqarluta ATASSUT-mit kissaatigaarput apeqqutit uku Naalakkersuisunit akineqassasut:

- 1) Nunatsinni qatserisartut annaassiniartartullu Kommunit ataaniinneranni iluaqutaasut aamma/imaluunniit akornutaasut Naalakkersuisut naliliinerat tunngavigalugu suuppat?
- 2) Naalakkersuisut piumassuseqarpat siunissami qatserisartut annaassiniartartullu aaqqissugaanerisa allanngortinneqarnissaannut, taamaalillutillu Kommunit ataaniikkunnaarlutik Namminersorlutik Oqartussat ataaniilernissaannut?
- 3) Iliuutsit suut Naalakkersuisut atorussuppat nunatsinni inoqarfinni tamani, illoqarfinni nunaqarfinnilu, naammattunik qatserisartoqarlunilu annaassiniartartoqarnissaa qulakkeersimatinniarlugu?
- 4) Naalakkersuisut piumassuseqarpat Nunatsinni qatserisartoqarfinni annaassiniartartoqarfinnilu sulisut tamarmik pitsaanerusunik sulinermi atugassarititaasut aammalu akissarsiarititaasut pitsanngorsaavigineqarnissaannut?
- 5) Naalakkersuisut piumassuseqarpat qulakkeerniassallugu nunatsinni qatserisartut annaassiniartartullu ilinniartitaanikkut aammalu ilinniaqqinnissatigut periarfissaasa aningaasanut inatsit aqqutigalugu pitsanngorsaavigineqarnissaannut?
- 6) Nunatsinni qatserisartoqarneq annaassiniartartoqarnerlu pillugit Naalakkersuisut immikkut allanik taasaqarusuppat?

Naalakkersuisut akissuteqarnissaat qilanaaraarput naatsorsuutigaarpullu ullut suliffiusut qulit qaangiutsinnagit akineqarumaarluta.